

# AHLI SUNNAH: ANTARA PERSIMPANGAN DAN KECEMERLANGAN

Oleh: MOHD ZAIDI ABDULLAH AL-ISHRAQI AL-SHAH' ALAMI

AHLI Sunnah Wal Jamaah pada hari ini dalam persimpangan, antara aliran pascamoden, Islam liberal, Islam hadhari, masyarakat madani dan lain-lain. Namun pada hemat saya ia berupaya bangun memimpin umat dalam bentuk kesederhanaan. *Khair al-Umuri Awsatuha* (sebaik-baik urusan adalah sederhana).

Umat Islam perlu memahami prinsip dan kaedah Ahli Sunnah. Ini satu-satunya cara supaya difahami dengan betul serta dapat membentuk tindakan yang mantap.

Persoalan-persoalan khilafiah perlu dikelaskan pada tempatnya yang sepatutnya. Tidak elok digembar-gemburkan tanpa beradab. Perbezaan pendapat yang dibenarkan tidak boleh dihalang.

Jika dilihat pada sejarah silam. Bagaimana perbezaan pendapat dalam empat mazhab dibenarkan, begitu juga perbezaan dalam kefahaman antara aliran Asha'irah dan Maturidiyyah. Para ulama kalam Sunni berusaha menghimpunkan perbezaan tafsiran dalam kedua-dua aliran ini seperti yang tersebut dalam kitab *al-Raudah al-Bahiyyah*.

Usaha ini patut diteruskan oleh ulama Sunni pada hari ini untuk membangunkan semula keupayaan Ahli Sunnah Wal Jamaah. Kena arifi perkara yang patut diislahkan pada masyarakat kontemporari.

Persoalannya pula kita berdepan dengan situasi Malaysia. Secara umumnya, Islam dalam perlembagaan disebutkan. Akan tetapi, penafsirannya agak lemah. Ini bukan penyebab kita pasif. Sikap tegas menilai dan memberi cadangan serta memperjuangkan dalam cara yang sesuai dengan masyarakat harus diambil kira. Islam menurut Ahli Sunnah boleh difahami melalui pelbagai karya-karya ulama Ahli Sunnah Wal Jamaah.

Kena ambil kira sikap dan perhatian orang barat yang mempunyai sikap menafikan hak-hak orang Islam. Nampaknya kebelakangan ini, terdapat NGO barat yang menaja pertemuan-pertemuan yang kontroversi tentang Islam dan sudah tentu melibatkan maruah Ahli Sunnah Wal Jamaah. Pada saya, mereka perlu ditegur supaya berbuat sesuai dengan keadaan masyarakat.

Memang, amalan demokrasi membenarkan kebebasan bersuara dan berfikir. Akan tetapi, adakah dengan menonjolkan kefahaman dan sikap yang tidak menyebelah masyarakat umum merupakan kebebasan berfikir atau hanya mengikut fikiran yang dibawa dari barat.

Barat pernah mengkaji dan menilai Islam di Alam Melayu. Kita boleh baca apa yang ditulis oleh Stamford Raffles dan Snouck Hurgronje. Memang, tidak kurang yang mengkritik beliau tetapi berapa ramai yang mampu mengeluarkan diri dari menjalankan operasi ilmu seperti mereka.

Jadi, kita patut membawa Ahli Sunnah Wal Jamaah menuju kemuncak kemajuan yang berteraskan kebenaran dan rahmat bagi seluruh alam. Kita di Alam Melayu punya keupayaan penyelidikan dan pembangunan yang amat kukuh sama ada ditinjau dari segi bukti atau tulisan. Kuala Berang Terengganu pernah menjadi pusat perdagangan serta perhubungan antarabangsa yang baik yang hampir semasa dengan era Samudera-Pasai. Ini bermakna segala ilmu, faham, sikap dan aktiviti hidup pernah memajukan umat di pantai timur dalam suasana harmoni.

Suka menarik perhatian, Islam pada zaman tersebut berkiblat aliran Sunni, bukan Syiah atau panteisme seperti yang dinilai oleh penyelidik barat dan orang-orang Islam sendiri. Kita boleh lihat sendiri ajaran yang terkandung dalam Batu Bersurat Terengganu yang bertarikh 702 H/1303M. Ajaran Islam ini ditegakkan oleh Syarif Muhammad al-Baghdadi yang datang dari Campa.

Keturunan tokoh inilah yang melahirkan Tok Pulau Manis yang akhirnya menuntut dengan Sheikh Abdul Rauf al-Fansuri dan kemudiannya, menuntut ilmu di Makkah dan di Madinah dengan al-Mujaddid Ibrahim al-Kurani (w.1101H). Kajian memperlihatkan bahawa jika benar aliran Islam sebelum bukan benar-benar Sunni maka sudah tentu kritikan terhadap mereka telah dilakukan oleh Tok Pulau Manis. Begitu juga kejayaan Sheikh Abdullah al-Qumairi yang berjaya membimbing raja Kedah.

Islam pada zaman lalu masih berpegang pada al-Quran, al-hadis, ijma' dan qiyas. Keempat-empat sumber ini difahami secara bersepadu dengan bidang-bidang ilmu lain seperti mantiq, tasawuf-tariqat, Hikmah sama ada yang Ishraqi atau Mashsha'i.

Saya membaca biografi Sheikh Kabir Badruddin al-Hasani, beliau sendiri mengajar kitab-kitab seperti Syarah Hikmah al-Ishraq karya Qutbuddin al-Syirazi. Betapa fahamnya dan luasnya ilmu beliau dalam memelihara tradisi Ahli Sunnah Wal Jamaah.

Ringkasnya, Ahli Sunnah Wal Jamaah telah mempraktikkan beberapa asas seperti berikut:

- Kebenaran ilahiyyat (yang bersangkutan-paut dengan ketuhanan)
- Kebenaran nubuwwah (yang bersangkutan-paut dengan kenabian)
- Kebenaran sam'iyah (yang bersangkutan-paut hari akhirat yang diketahui melalui lisan Nabi Muhammad s.a.w)
- Rukun al-Din (Iman, Islam dan Ihsan)
- Khair umur awsatuha (sebaik-baik urusan itu sederhana)
- Mantiq-usul fiqh-qawa'id fiqh-adabul bahts-hikmah-kesepaduan ilmu seperti tercontoh pada karya *Jam' al-Jawami'*, *Lubb al-Usul*, *al-Ta'arruf* dan lain-lain. Ini berbeza dengan pemecahan ilmu ikut jabatan atau fakulti yang terdapat pada hari ini. Untuk mengelak perpecahan ilmu dan cendekiawan perlu terdapat dialog 'bermakna' untuk menetapkan kesatuan dan kesepaduan ilmu sesuai dengan keuniversalan al-Quran dan al-Hadith.
- Menghormati keturunan Nabi Muhammad s.a.w.
- Perjuangan menegakkan kebenaran sesuai dengan suasana setempat

Inilah perkara-perkara yang sekadar dapat penulis sebutkan untuk pembaca umum. Sebenarnya ada karya-karya yang menyarankan kekukuhan penganutan Islam dan umatnya seperti dalam kitab *Nasihah Ahl al-Islam* karya Sayyid Muhammad bin Ja'far al-Kattani.

keterangan lanjut, hubungi:

mzaid@ilhamkanku.com.my

www.ilhamkanku.com.my ; <http://ilhamkanku.tripod.com>

Akademi 'Ulum Pondok Dan Pencerahan Tamadun,

Shah Alam, Selangor Darul Ehsan.

Nota: Artikel ini ditulis pada hari Rabu 15/08/2007 bersamaan 2 Sya'ban 1428 Hijrah antara jam 3.00-4.30 pagi.